

## Naqqiut

Allannguutissatut siunnersuut 22. maj 2024-meersoq taarserpaa  
 (Siunnersuut Naligiissitaaneq assigiinngisitsinnginnissarlu pillugit Inatsisartut  
 Inatsisaannut siunnersuutip, aappassaanneerinninnissamut taarsiullugu,  
 pingajussaanneerneqarneranut saqqummiunneqarpoq)

Uunga

allannguutissatut siunnersuut

### **Uunga siunnersuut: Naligiissitaaneq assigiinngisitsinnginnissarlu pillugit Inatsisartut inatsisaat**

#### **Pingajussaanneerneqarnerani Naalakkersuisunit saqqummiunneqartoq**

§ 8-mut

##### **1. § 8, imm. 3, ima oqaasertaliorneqassaaq:**

”*Imm. 3. 4-miit 7 ilanngullugu § 15 apeqqutaatinnagit, atorfinitsitaanermi atugassarititaasuni kalaallisut oqaatsit atorneqarnissaat pillugu aalajangiinissamut Inatsisartut inatsisaat manna akornusiinngilaq.*”

Allannguutissatut siunnersuummut oqaaseqaatit

#### **Nalinginnaasumik oqaaseqaatit**

Assigiinngisitsinissamut inerteqquteqarnerup unioqqutinneqarneranik kinguneqanngitsumik, inatsisisatut siunnersuutikkut atorfilinnut atorfinitsitaanermi atugassarititaasuni kalaallisut oqaatsinik atuisinnaasariaqarneq pillugu piumasaqaateqartoqarsinnaavoq.

Piviusut naapertorlugit atorfiup suliarinissaanut tamanna pisariaqartinneqarpat, aamma siunertanut pisariaqartunut aamma inatsisitigut akuerisaasunut tamanna aammattaaq tunngavissaqarpat, atorfinitsitaanermi atugassarititaasunut atatillugu oqaatsit allat atorneqarsinnaanerannik aamma piumasaqaateqartoqarsinnaassaaq. Taamaalilluni sulianut tunngatillugu tamanna tunngavilersugaassaaq aamma atorfiup pineqartup suliarineqarsinnaanissaanut naleqquuttuussalluni. Assersuutigalugu silaannakkut angallannerup iluani sulianik suliarinnissinnaanermut atatillugu tuluttut oqaatsit

atorsinnaasariaqarnerat pillugu piumasaqaateqartoqarsinnaavoq. Ilaatitsinnginnermi ilanngunneqarnissamut oqaatsit pillugit piumasaqaatit taamaattut aalajangersakkap imm. 1-ani piumasaqaatinik naammassinnittussaapput.

### **Allannguutissatut siunnersummi aalajangersakkanut ataasiakkaanut oqaaseqaatit**

Inatsisartut inatsisaanni assigiinngisitsinissamut inerteqquteqarnerup, qinnuteqartunik kalaallisut oqaasilinnik sallititsinissamik akornusiinnginnissaa pillugu aalajangersaasoqassasoq, siunnersuutigineqarpoq.